

江

西

詩

徵

江西詩徵卷四十七

南城曾煥賓谷編輯

明

曾榮

榮字子啟永豐人永樂二年進士廷試第一授翰林修撰以文學見任修永樂大典及天下郡邑志諸大制作皆出其手歷詹事府少詹事卒贈禮部侍郎諡襄敏有巢睫集西墅殘藁

題王學士所藏老檜蒼崖圖

王郎工畫妙入神平生強項世所嗔有時興至自盤礴睥睨已喜旁無人忽然放筆作古檜白日烟雲倏冥晦淋漓

盡帶雷雨垂慘淡長疑鬼神會古藤纏絡枝相繆屈鐵磔
柯騰蛟虬左擎右攫飛不去崖石欲裂山精愁王郎一生
何不遇五十得官嗟已暮胸中時吐氣崢嶸半落蒼崖化
爲樹知君愛此長蕭森藏之愿比雙南金秋來恐有乘槎
客泛入天河無處尋

淮南舟中

遠戍雞聲曉遙堤柳色濃斷雲京口樹殘月廣陵鐘簫鼓
官船發圖書御寶封朝臣多扈從冠佩日相逢

維揚懷古

廣陵城裏昔繁華煬帝行宮接紫霞玉樹歌殘猶有曲錦
帆歸去已無家樓臺處處惟芳草風雨年年自落花古往

今來多少恨只將哀怨付啼鴉

憶別

一家去住兩關情行李蕭然又出京記得別時寒食後斷
烟殘雨石頭城

卽事

片片飛花逐水流傷春何處最多愁紅粧獨倚闌干立望
盡征帆不下樓

北華仙壇

樓殿玲瓏紫翠間尋真幾度到仙壇玉爐伏火黃芽熟瑤
草吹香碧甃寒半夜風雷歸洞府五更星斗掛闌干何當
一訪緱山侶天上吹簫跨鶴鸞

題王孟端墨竹送人南歸

十年官舍長安陌，欲種篔簹愁地窄。
軒前有此八九竿，蒼然一片瀟湘色。
九龍山人思不羣，胷襟灑落如此君。
筆端颯颯起風雨，紙上漠漠生烟雲。
幾回看竹稱奇絕，爲寫琅玕照冰雪。
縱橫屈鐵金錯刀，滿堂便覺秋蕭騷。
周郎愛竹癖於我，興至時尋竹邊坐。
我生疎懶無所爲，但與江海同襟期。
喜君愛竹有如此，便以此圖持贈之。
丹楓白水江南路，歸帆直向湖中度。
慎莫提携過葛陂，恐化羣龍上天去。

駕發臨城

雞鳴寒漏徹，車駕發臨城。
殘月千山曙，浮沙一路平。
雲光隨鳳輦，露氣濕霓旌。
馬上頻回首，猶看燎火明。

荏平

地旱空多井林疎遠見樓平山通縣界潔水入河流過客
詢張鑄鄉人說馬周北來多古蹟惜未得淹留

涿鹿道中

遠樹孤城出高原四望遙山從平地起雪到暮春消細草
承雕輦垂楊拂御橋愁連易水上風色正蕭蕭

別弟憲副鼎

莫向尊前唱渭城老來離別最傷情江南渺渺孤舟夢嶺
外迢迢萬里程曉馬曉嘶霜氣肅鱷魚夜徙海潮平到時
應及春初候先報京華白髮兄

夾溝

東風吹暖柳絲柔十里青山繞夾溝馬上逢人相借問計
程兩驛到徐州

灌嬰城

章江南面有荒城千載猶傳漢將名狐宿斷垣春草合鴉
啼古堞暮烟平風雲暗想精靈聚茅土長垂竹帛榮猶有
離離霜後樹還如赤幟繞竹營

冬日扈從還南京隨駕出麗正門馬上作

朝隨六龍駕遠別黃金臺萬乘出都門旭日淨浮埃翠華
正飛揚玉輦從天回羽林羅猛士夾道馳雲雷回首望玉
京城闕何壯哉海水向東流西山鬱崔嵬上有五色雲垂
輝映蓬萊壯遊愜周覽欲去仍遲回策馬天仗間夙昔長

追陪古來詞翰臣豈但鄒與枚至今百世下聲譽揚九垓

天廐神兔歌 并序

永樂七年春二月余以扈從北巡給賜內廐兔色馬一疋蓋朝鮮所貢也神駿超越異于凡馬經數千里若有餘力予聞古良馬有赤兔之名故作神兔歌以贊之

天廐名馬不易得鳳臆龍鬣秋兔色圉官廝養十載餘云昔來自朝鮮國想當此馬初生時蛟龍降精雷雨垂房星夜墮水盡赤雲霧下繞靈風吹雄姿逸態真神駿踠促蹄高雙耳峻目光夾鏡爛方瞳汗血流珠膩紅暈朝鮮得此不敢騎覆以黃氊獻赤墀迺知天廐盡龍種如此萬疋皆

權奇今晨韜出迴殊絕扈從鑿興自超越朝趨遠蹴交河
冰夕秣驕嘶薊城月君不見驍驅肅霜古亦多老不一試
將奈何駑駘無力枉蹠躩俗馬有肉空嗟峨平生憐爾獨
遭遇繡勒金鞍照瓊署相期慎保不凡姿萬里長隨六龍
馭

贈筆工陸繼翁

吳興筆工陸文寶制作不與常人同自然入手造神妙所
以舉世稱良工有時盤礴坐軒裏石盤水清如鏡中空山
老免脫毛骨簡拔精銳披蒙茸平原霜氣在毫末巾面猶
覺吹秋風製成進入蓬萊宮紫花形管飛晴虹九重清燕
發宸翰五色綉爛皆成龍國初以來稱絕藝光價自此垂

無窮惜哉文寶久已死尚有家法傳繼翁我時得之一揮
洒落紙欲挫詞場鋒聚心蘭蕙動光彩栗尾雞距爭奇雄
搗來簪此扈仙蹕欲補造化難爲功夢中無人授五色安
得錦繡蟠心胸閒來書空不成字縱有篆刻慚雕蟲幸今
太平重文學玉堂金馬多奇逢莫言盛事少知己爲我寄
謝管城公

陳員外奉使西域周寺副席中道別長句

漢家郎官頭未白扈從初爲兩京客忽逢天邊五色書萬
里翩翩向西域腰間寶劍七星文連旌大旆何繽紛解鞍
夜臥營中月攬轡朝看隴上雲黃砂斷磧千迴轉玉關漸
近長安遠輪臺霜重角聲寒蒲海風高弓力軟茲行騎從

歷諸蕃羶帳依微絕漠間殘煙古樹羌夷聚遠火荒原獵
騎還蕃酋出迎通漢語穹廬蒲萄酒如乳舞女爭呈于闐
粧歌辭盡協龜茲譜當筵半醉看吳鉤上馬便著金貂裘
山川遙認月支窟部落能知博望侯草上風沙亂騷屑邊
頭日暮悲笳咽行窮天盡始回轅坐對雪深還仗節歸來
雜遝宛馬羣立談可以收奇勲却笑古來征戰苦邊人空
說李將軍

燉煌曲

并序

唐憲宗時吐蕃使其中書令尚騎心兒攻燉煌刺
史周鼎嬰城固守鼎請救回鶻踰年不至都知兵
馬關朝殺鼎自領州事守城者八年出綫一段換

麥一斗存者甚衆朝喜曰可以死守又二年糧械
皆盡登城諄曰爲毋徙他境請以城降騎心兒許
諾於是出降自攻城至是十一年州人皆服臣虜
歲時祀祖父衣中國之服號慟而藏之

吐蕃健兒面如赭走入黃河放邊馬七關蕭索少人行白
骨戰場縱復橫燉煌壯士抱戈泣四面哀笳聲轉急烽煙
斷絕鳥不飛十一年來不解圍傳檄長安終不到借兵回
紇何曾歸愁雲慘淡連荒漠捲地北風吹雪落將軍錦鞬
暮還控壯士鐵衣夜猶著城中疋綾換斗麥決戰寧甘死
鋒鏑一朝虜騎忽登城城上蕭蕭羌笛聲當時左袵從風
俗至今藏得唐衣服年年寒食憶中原還著衣冠望鄉哭

老身幸存衣在篋官軍幾時馳獻捷

龍支行 并序

唐穆宗時遣大理卿劉文鼎出使吐蕃道成紀武川以至龍支城耆老千人拜且泣問天子安否言頃從軍戰敗于此今子孫未忘唐服朝廷尚念之乎兵何日來言已皆嗚咽密聞之豐州之人也

龍支城頭暮吹角黃雲蔽天沙艸薄虎髯使者長安來持麾擁蓋邊城開城門盡是蕃兵守城外老人多白首拜迎使者雙淚流問云天子今安否自言家世豐州住少小辭家隸軍戍吐蕃昨日犯蕭關突騎長驅涇隴間將軍戰敗鼓聲絕棄戈遺鏃填邱山自從陷沒身爲虜五十年來在

邊土依棲部落作羈人生長兒孫盡蕃語朝看烽火望中
原夜聽鳴笳憶故園頽垣敗屋誰家宅斷磧荒蹊何處村
奉使還時報天子早遣官兵復清水假令年老身歸死已
免游魂作邊鬼

姚少師所藏八駿圖

周家人馬如飛電夙昔傳聞今始見銳耳雙分秋竹批拳
毛一片桃花旋肉駿疊聳高崔嵬權奇如此真龍媒霜蹄
試踏層冰裂駿尾欲掉長颺迴瑤池宴罷歸來早絡月羈
金照京鎬紫鞵飛時逐落花雕鞍解處眠芳草由來駿骨
健且馴弄影驕嘶不動塵有時渴飲天津水五色照見波
粼粼圍官騎來難久駐飲向春流最深處珠銜寶勒不敢

疎直恐飛騰化龍去古來善畫草與韓此畫豈同凡馬看
人間造次不可得首蓓秋深煙雨寒

過劉伶宅

舊宅無人住荒墟有路岐一生渾是醉萬古復何悲白首
銜盃處青山荷鋪時最憐獨醒者高塚亦纍纍

車駕渡江

朱旗畫戟擁晴沙錦纜牙檣照浪花佳氣迴浮江北樹曉
光初綉海東霞雲中鸞鳳扶丹轂水底魚龍識翠華不用
臨流羨天塹只今四海盡爲家

駕次江心驛

清蹕初傳日未西鴻臚將引唱班齊營門風暖千旗動輦

路雲香萬馬嘶，艸綠夜塘多是水。雨晴沙道不成泥，忽傳四鼓鑿輿發。不寐時時聽曉雞。

居庸關

重關深鎖白雲收，天際諸峯黛色流。北枕龍沙通絕漠，南臨鳳闕壯神州。烟生睥睨千巖曉，露濕芙蓉萬壑秋。王氣自應成五采，龍文長傍日光浮。

海子橋

鯨海遙通一水長，滄波深處石爲梁。平鋪碧甃連馳道，倒瀉銀河入苑牆。晴綠乍添垂柳色，春流時泛落花香。微茫迴隔蓬萊島，不放飛塵入建章。

項羽廟

百戰休論蓋世功，鴻門宴罷霸圖空。
虞歌慷慨孤燈下，楚業消沉一炬中。
露濕古牆秋藓碧，霜含老樹夕陽紅。
英魂若到彭城路，忍聽高臺唱大風。

送兵部尚書陳公出鎮交趾

南交奏凱正論功，司馬新承寵眷隆。
三受虎符參閫外，兩持龍節鎮蠻中。
蕭何經國頻供餉，裴度臨邊暫總戎。
已喜夷人歸版籍，伏波銅柱謾爭雄。

正旦後送兵部尚書趙公還鎮

總戎司馬舊春官，坐鎮邊陲衆自安。
雙闕朝元瞻御展，六州行部駐雕鞍。
履聲暫待金門滿，旆影還衝玉塞寒。
明到關城多暇日，好將佳句寄朝端。

送彭巡檢子韶赴閩清兼示光澤舍弟

送君南去片帆歸五月薰風白紵衣路邊岡山征騎遠月
明蠻徼邏兵稀枕椰綠暗經殘雨荔子紅垂映落暉小弟
衫關煩寄語客心長伴鶴鴿飛

新館內直

華館深沉直禁闈彩蕙丹碧煥翬飛上林萬樹連西掖北
極諸星拱太微繞硯龍香裁詔罷隔簾鶯語退朝歸應知
幾度青綾夜月轉金莖露滿衣

送陳郎中重使西域

曾驅宛馬入神京拜命重爲萬里行河隴壺漿還出候伊
西部落總知名天連白艸寒沙遠路遶黃雲古蹟平却憶

漢家勞戰伐道傍空築受降城

玉關迢遞塞雲黃西涉流沙道路長山繞高昌遺碣在艸
遮姑默廢城荒閑聽羌笛多乘月暗捲戎衣半帶霜不用
殷勤通譯語相逢總是舊蕃王

重宣恩詔向窮邊蕃落依稀似昔年酋長拜迎張繡幌羌
姬歌舞散金錢葡萄夜醉毼毼月駿屢晨嘶首蓓烟百寶
嵌刀珠飾靶部人知是漢張騫

揚州

翠裙紅燭坐調笙一曲嬌歌萬種情二十四橋春水綠蘭
橈隨處傍花行

桐岡書屋

梧桐在高岡下有隱者居屋後山削玉屋前水鳴渠屋中
何所有插架多古書竹簡識科斗芸香驅蠹魚豈伊惜可
陰庶用勤三餘名教有真樂孜孜遂忘劬及茲得賢嗣發
朝登雲衢追陪青鎖賢出入承明廬聲光動鄉邑此星信
不虛黃金雖滿籛祝斯諒弗如墨莊有遺訓永矣垂名譽

靜海感書

紅燭當壚夜數錢驛亭西面綠楊邊重來烟景渾如舊只
認青帘記昔年

旅懷

十年京國鬢蕭蕭薊北江南萬里遙家住潯陽猶尚遠莫
將音信託寒潮

遊白鹿洞

昔人愛山住幽谷上山下山騎白鹿一朝振袂入長安出
爲唐家秉鈞軸功成拂衣歸故邱還與白鹿山中遊朝拂
香爐之紫烟暮飲瀑布之清流滄桑一變成煙落書堂重
構絃歌作紫陽賦罷三百年從此文光照巖壑

題黎司業載酒堂

高堂樂事道如何花裏朝回載酒過但使清樽如北海豈
無佳客似東坡興來問月何時到醉後看山幾處多我欲
相從須痛飲願傾一石更高歌

送陳公望下第南還

三月東風御柳斜憐君失意到京華心傾紅日重門遠足

踏青雲歸路賒天上終期承雨露山中未許臥烟霞玉堂
相候重來日開徧薇垣幾度花

三山書閣

結屋山深幾十年藏書閣小兩三椽先朝事業文章在昭
代科名禮樂傳雲濕墨香生藻筆月移簾影上芸編潛心
力學忘寒暑何日能磨鐵硯穿

袁州岡孚惠廟

廟貌巍巍歷宋元畫梁雕棟枕仙源丹青顧凱名猶在規
矩公輪迹尚存荒草淡烟閒白晝古槐斜日又黃昏真人
飛筆書詞扁百世流傳道法尊

滕王閣

峩高閣出洪州佩玉鳴鸞帝子遊謾有文章傳盛事更
無賓客宴清秋綺羅香逐浮雲散絃管聲隨逝水流莫向
畫圖看蛺蝶夢來何處問莊周

孺子亭

東湖老樹拂晴雲樹裏空亭識聘君鶯轉綠陰初過雨鴉
啼涼影半斜曛誰懸木榻延高士空致生芻弔古墳千載
高風遺像在令人懷仰挹清芬

曉渡章江

日落西山欲曙天渡頭人語古城邊鐘聲杳靄臨江戍帆
影參差隔浦船幾處蘼蕪深夕露萬家楊柳暉晴烟年年
過客頻來往誰復東流嘆逝川

周述

述字崇述吉水人永樂二年進士廷試第二累官左春坊左庶子有東墅集

玩秀軒

華軒臨清流秀色堪攬結霞彩相蕩漾波光互明滅花飛渡頭春帆落洲上月縱觀心目超靜對形神悅應共滄浪人濯纓笑予拙

維揚懷古

廣陵河上路煬帝昔曾過不見隋花發猶傳玉樹歌臺荒衰柳在宮廢亂螢多欲問前朝事悲風起夕波

賜觀燈詩

今夕逢元夕歡聲遍九垓星臨銀漢動月傍碧空來紫禁
千花繞金門五夜開聖情同宴賞玉漏不須催

寄楊顯道先生

我憶楊夫子風流似昔人素琴長對月白髮不憂貧彭澤
陶元亮稽山賀季真相思欲相見烟樹幾回春

南歸詩

久客歸心切舟行何獨遲不愁歸日晚恐負到京期微雨
寒生夕長河水落時故園空悵望烟樹正離離

踏雪

一路寒山雪未消尋芳不惜碎瓊瑤梅花昨夜將春色開
到江南第幾橋

瀟瀟廟

瀧波欲渡虹爲橋瀧灣椿擊蛟龍跳瀧頭有廟非一朝瀧
民獨傳神姓瀟殿脚插入白鷺腰青原舞翠揖容堯朱甍
月出烟霧消碧瓦不動摩青瑤忽然飛電掣紫霄天爲借
怒生奇飈游龍揮雨洗沘瀲桂花墜落香風飄不聞古木
鳴老雕甍能擊鼓鸞吹簫官艘賈舶膽欲焦廟前停櫓不
敢搖楚詞跪奠設漿椒瀧之神兮或可招

葛仙壇

白石香崖望欲迷仙壇下瞰楚江低靈泉雨過花初發深
谷春來鳥自啼劍氣猶疑射牛斗丹光常見拂虹霓世人
誰復知行徑瑤草依依綠正齊

周孟簡

孟簡號竹礪吉水人進從弟永樂二年進士廷試
第三官詹事府丞出爲襄王左長史有竹礪集

丙午除夕

爲客逢今夕寧親憶去年一尊終不醉孤館自無眠家在
雲山外身依日月邊何堪雙鬢改又值歲華遷

劉懋烈柘庄別業

隱居卜築柘溪濱門帶清流絕四鄰卷幔泉蘿烟外曙忘
機魚鳥鏡中春青松晚映橫琴室黃菊秋香漉酒巾生意
漸回原上草呼童放犢伴山人

李昌祺

昌祺名貞以字行廬陵人永樂三年進士選庶吉
士與修永樂大典有疑難皆就質之擢禮部郎中
出爲廣西左布政使改河南數月政化大行正統
間致仕家居二十餘年卒有容膝軒草運甕漫藪
送陳郎中重使西域

寶帶懸魚服雕弧掛馬鶻皇恩覃萬國兵氣警諸邊瀚海
寒生月崖城暮鎖烟欲窮西域事班范有遺編
地勢三城遠河源二水分火山稀好雨鹽澤足愁雲鵬沒
平沙外駝鳴絕澗瀆憑高時引睇何以策中原
出塞春乘傳投鞭晚下營旋風胡馬疾掣電皂雕輕浩蕩
窮源志迢遙奉使程支機如得石持往問君平

行盡伊吾道，胡天氣候殊。
神僧留白骨，毒草隱元蛛。
近水多行帳，窮荒絕遠書。
竚看歸覲日，玉勒控宛駒。

宿端壁寺

遺構象王宮，荒涼小邑東。
一燈秋殿閉，孤榻夜窗空。
飢噉牀頭鼠，愁吟砌下蛩。
蕭蕭黃葉墜，庭樹顫西風。

彭澤縣石崖僧房

窗戶俯澄潭，龍宮似可探。
藤蘿棲鵲樹，蕤錫定僧岩。
斜日疎疎磬，長風去去帆。
只應輸野衲，長此臥烟嵐。

送人南歸

離絃兼楚調，忍向醒時聞。
連歲長爲客，他鄉更別君。
鷗波明夕照，鴈字寫秋雲。
迢遞還鄉夢，相隨到海分。

年年長在客北薊復南京秋雨滄洲鴈春風采石鷺好山
環故里流水背孤城去住無拘繫閒身到處輕

喜張進士叔豫見宿旅舍

窮巷寂無鄰青燈共故人遠聲霜下磬孤影客邊身露冷
蛩相弔庭寒月自親殷勤一瓢酒更與話酸辛

宿廢普濟寺

青山行欲盡深樹見僧房雲氣千峯暝秋聲一院涼長藤
懸破衲脫葉覆空廊龍象黃金地蕭蕭蔓草長

三月四日卽景

忽忽春將暮俄過三月三草誰憐益母花自媚宜男乍到
尋巢燕初眠上箔蠶新茶與稗笋鄉味憶江南

張舒州家觀元承旨危素畫像

虞揭凋零玉箸空，堂堂至正獨推公。
氣全河岳英靈秀，手抉雲霞制作工。
江總歸陳，鬪恨老賈生鳴漢，早稱雄丹青。
似有無窮意，却寫南冠入畫中。

柳

含烟裊霧自青青，愛近官橋與驛亭。
春滿章臺偏婀娜，秋深隋岸最凋零。
長從蘇小門前折，幾向龜年笛裏聽。
絕勝東風桃李樹，飛花猶解化浮萍。

駕幸朝天宮祭星之作

上帝蕭臺衛百靈，儲皇拂曙醮羣星。
清都秘籙開雲篆，白晝神雷擲火鈴。
曉露未乾珠樹濕，天風微動寶花零。
叨恩

久在南宮裏長從鑿輿幸冶亭

送熊生還鄉

石頭城下柳蕭疎久客懷歸念遠途鄉夢每生鐘斷後客
愁偏在酒醒初扁舟暮雨青衫薄折葦涼風白鳥孤擬共
邱園尋別業臨岐相送獨踟蹰

晚春郊外

柳外輕風拂面來春忙半是杜鵑催多般野菜參差老幾
樣林花接續開竹爲近堦難迸筍松因臨水易生苔追思
往日嬉游伴聚散如雲倍可哀

雨外林鳩不住啼落紅狼藉半沾泥秧苗帶穀根猶淺麥
幹垂花穗已齊鷗下只投荷葉嶼蝶飛多傍菜花畦青山

綠水饒詩景歸路扶筇醉懶題

楊柳枝

參差幾樹瞰長河樹樹垂金拂綠波不是秋來易零落自
緣人世別離多

細葉如眉綠未勻修眉渾似帶愁顰輸他桃杏東風裏不
管南遊北去人

客夜聞砧

荒草蕭蕭郭隗臺清砧明月兩堪哀千愁百感多如雨今
夜燈前一併來

山中見牡丹

不嫌惡雨并乖風且共山花作伴紅縱在五侯池館裏可

能春去不成空

經浯溪讀元結大唐中興頌

平生念浯溪，錫鑿有遺跡。揚舲泝湘水，登臨蹙來卽穹崖。
倚層霄，竒險自天闢。漫叟詞旣嚴，顏公筆無敵。鬼神屢呵
護，風雨長洗滌。忠概儼尚存，永銜猶可識。端容斂襟讀，感
慨重心戚。誰畫靈武謀，大物取何亟。唏嗟中興業，諒重君
子惜。逡巡解舟去，回顧三歎息。

夏末偶尋洞惠道院

曉起京月淡，絺衣坐肩輿。灑然塵慮豁，遂卽道者廬。蕭條
殿廊存，亭軒化荒墟。山門憇樵農，薜砌鹿豕趨。雷傾有墮
瓦，樹伐無遺株。仙家尚消沉，况乃俗士居。蓬萊屢清淺，此

事諒弗虛吾聞至人言一氣運化樞莫窺機纖微孰外定
數拘通由飢亡命載以賄喪軀榮華豈久在役智悲羣愚

丙寅初度作

余生如稗松由寸望百尺既承雨露滋亦受霜雪積蹉跎
踰七十勤苦曾備歷誤蒙明聖知謬忝中外職顧已慚菲
薄於時乏裨益處盈虧必隨履泰否斯卽至理諒在茲昧
者固弗識叩闕乞殘骸休退恩旨錫遂令犬馬軀獲返田
野跡長揖畫省條重負從此釋今辰届初度厨傳仍岑寂
傍人競嗤笑窮約猶曩昔妻孥頗愧赧而我固悅懌平生
守儒素晚節敢變易回思永樂初歲月類梭擲同年四百
餘多已在鬼域存者纔十輩猶破利名役迂疎獨向幸林

下得偃息遺榮遂安閒養靜忘跛蹇游鱗泳清波羈鳥歛
倦翼貧非吾所憂病豈吾所戚

過吳門次陸天錫韻

七澤三江通甫里楊柳芙蓉照湖水閫門過去是盤門半
掩珠簾畫樓裏靡蕪生遍鴛鴦沙東風落盡棠梨花館娃
香徑走麋鹿清夜鬼燈明絳紗三高祠下東流續真孃墓
上風吹竹西施去後屨廊傾歲歲春深燒痕綠

高道士所畫山水

伊誰丹青擅能事畫出羣山與山似樹杪如聞雪瀑泉林
間疑有雲門寺杖藜橋上知何人抱琴可望不可親高師
指點笑相語我昨圖成殊逼真

題周參政所藏山水小景

天壤有異境，描摹付良工。佳山與秀水，幻置軒窗中。村村陌陌皆勝處，花竹園林饒雅趣。過鳥疑飛却不飛，行人欲去何曾去。松坡竹塢壘更重，雪瀑倒濕青芙蓉。岡巒島洞盡在眼，樵牧耕釣俱可容。九曲溪流漾清泚，荒渡斜陽見舟尾。石上吟翁鎮日留，欄前眺客今年倚。我觀風物似杭州，樹木雲霞分外幽。豈必西湖有奇勝，展圖高興亦悠悠。

題秋塘鵲鶴圖

秋風浙澀秋塘淨，菰米沉波荷折柄。翻藻魚跳水氣腥，采菱人散歌聲定。蓮莖嫋嫋綴枯房，上有雍渠立晚涼。翠蓋裂殘渾改色，紅衣落盡尚餘香。圖中頗得周詩義，未論工

拙先觀意不寫和鳴寫急難人間誰獨無兄弟嗟我龍鐘
命弗齊今年同氣委黃泥白頭徒重鶴原感展卷他鄉忍
淚題

留魯山縣

黎庶凋殘甚惟餘朴儉風名因元子重地本魯王封撫卹
無賢令流移有情農誰將于鴛曲歌向五雲中

新野卽景

村暗濛濛雨流渾淺淺溪菊花長帶濕豆莢半沾泥野迥
居民少林昏去路迷自投新野界蒿草與人齊

周原幽居

山色蛾眉秀江流燕尾分亂蟬吟落日獨鶴引歸雲黃葉

溪邊樹青帘雨外村興來畱客坐隨意倒芳尊

早發小孤山遇風

湖盡江逾闊舟窮路若迷垂楊春寂寂芳草雨淒淒
龍巖窟平沙雁鴛堤風波隨地有何處可幽棲

送陳生歸吉水赤岸

清砧兼落葉總是別離情去路千程遠歸舟一葉輕
秋雲連樹暗寒日映川明亦有滄浪興何時共濯纓

送戴教授北行

別路三春雨行舟五兩風花香隨路減柳色上衣濃
共是青雲客先成白髮翁離情如逝水萬折亦朝東

新安謠

新安野老髮垂肩說著先人淚
泣然洪武初年真少事幾
曾輕到縣衙前

垂老頻逢歲薄收秋租多欠賣耕牛
縣官不暇憐飢餒喚
拽官車上陝州

當夫當匠子孫亡田地荒蕪戶有糧
昨日迤西蕃使過盡
驅婦女趕牛羊

嵩縣遇端午

老大偏多故里心一逢佳節一沾襟
誰知此日菖蒲酒又
在山城獨自斟

春日與高逸人行秦淮河上作

端居苦無悰今日得良契逍遙出近郭
散策淮水際草軟

倦堪眠林香醉宜憩鳥哢晴始和川容晚逾媚篠深風葦
密沙沒夕潮至野鷺渾忘機似識靜者意幽懷頗得愜逝
景苦難繫候卒哺欲還春城暝將閉因知市朝隱兼有林
壑致永言終此生涵泳太平世

題王司直所藏米南宮畫

幽壑霽殘雨飛雲晝濛濛大江瀉練遙上與銀河通村墟
極平曠島嶼迷西東長林隱空舍衆籟吟天風懸崖忽焉
斷浩蕩烟濤雄夕嵐落霞外把釣何老翁流水共情性沙
鳥知心胸浩然滄浪歌濯足清潭中始知簪紱華不與漁
樵同興適隨去畱身閒忘達窮我生本放浪中年抗塵容
觀圖思初服脫屣期息躬長揖鳳鸞侶永投鷗鷺蹤自此

邨衙勒郊原春草豐

讀道書作

疎林過微雨綠葉當窗垂緬彼古仙者秘言良難窺畫觀
探其蹟中夜夢見之玉色龍鳳質金章鸞鶴姿稱云瑕邱
仲壺壺示端倪元理貫而徹素心欣以怡伊余烟霞性早
歲慕無爲驚悟但虛空鸞輪那可追

題雙燕圖寄表弟陳安行

君家陰溪北我家郡城西君家梁間燕我家梁間棲我從
出鎮來寒暑又三變不見故鄉春惟見故鄉燕挈家古城
還寓家汴河湄燕識主人心相隨不相離念君千里隔見
君幾時得欲令燕銜書飛歸到君側君能弗吾棄爲理白

雲莊願言共君老看燕雙飛翔

雪中偶至相國僧舍

精藍創何朝規制極殊勝閭浮權劫火無復莊嚴盛惟餘
白足僧短褐露兩脛我于大雪中獨至偶乘興難尋金布
地頗訝玉爲徑婆娑絕塵翳似得天眼淨泠泠梵唄音細
雜鏡與磬欣然遂忘返宿留逮二昏冥乃知向上機無臺亦
無鏡徒勞費辭說妙在悟自性世無毘耶翁孰拯衆生病
願言投空門跣趺事禪定

送楊郎中催馬草還京

大梁據中土自昔風氣旺北部北蜿蜒太室極雄壯黃河
貫其間浩浩恣奔放四野開平平甸桑柘綠相嚮丁男事耕

樽姑婦治絲織菽麥盈倉庾醕醴溢益益近歲頗凶屯旱
曠農望念此飢餒餘十室九鰥曠長貧負租稅遠役困
夫匠督芻實賴公區畫咸適當深體堯舜心推仁憫獨喪
叱咤尚弗忍矧肯施鞭杖愧余譴劣才旬宣乏善狀竭力
奉寬條庶減疲癯恙贈別陳民艱冀君徹卿相

洞章

縹緲大梵境玉京何寥寥空洞無色根泛兮若浮飄陽精
鎮朗耀豈復知昕宵燿燦丹霞中浩歌白雲謠一聽衆緣
息再聆羣累銷劫運自茲度稽首登神霄

浮黎始上青浩氣長空濛溟滓窮無朕端倪那可窮梵川
玉虛界不與諸天同羣仙時遨遊翳鳳駕赤龍年壽罔有

極莫能測其終泛詠黃雲裏肅侍彌羅宮

潢溪釣者逸閑軒

白髮潢溪釣游者半生浪迹棲林野已慣爲農夜飯牛寧
能執策朝馳馬只知物外無喧囂養花種樹東津橋縱橫
坐席雜樵牧傾倒甕盎忘哺朝醉來就牀且高臥一枕從
教日西墮蓋世功名逝水流薰天富貴飄風過烟霞泉石
聊徜徉青雲要路非所望乃知靜處有真樂却笑時人何
太忙

賦得小孤絕壁送人還鄉

海門砥柱長江許東南羣流皆下經蕩摩霄漢壓溟渤鎮
控吳楚資神靈百丈懸崖竇奇壯銀濤雪浪相舂撞層巔

俯視飛鳥背曲徑斜通白雲上中有重淵龍伯都瓊宮貝
樓如玉壺天晴蜃氣秋成市月冷鮫人夜泣珠羨君歸去
過其地政好登臨騁遐睎賈客爭祈天姥祠妖巫謾設彭
郎祭解纜開舟肯暫停乘風破浪如流星明日思君不可
卽天涯惟見此山青

琴清軒

野客本冲素瑤琴何靜淵層軒久絕俗士跡綠綺自上朱
絲絃初彈徵調聲古澹澤國葦寒鳴旅鴈再彈宮音如迸
泉水盤亂走珠璣圓斯須改調羽仍角灑灑明珠相續落
秋冷瀟湘見斷雲春和鸞鳳鳴阿閣吾聞伯牙昔善琴後
來不復傳遺音如何到處聽者少悠悠山水空高深銀箏

錦瑟人同喜流蕩哇淫悅俗耳衛國誰知擊磬心齊門孰
識吹竽耻三尺焦桐只獨怡希聲大雅世豈知但令妙解
徽絃趣不必黃金鑄子期

題山水小景

良工寫幽景運思頗不凡高崖掛懸瀑迴野生輕嵐林昏
日欲墜天暝雲初罩遠岸少去舫長途乏來驂摩挲老眼
著意看彷彿還似湖湘南憶曾之官屐經此孤舟晚泊語
溪潭葉剝老樹曲偃蹇泉觸亂石森巉岩衆禽歸飛宿且
食雄鳴雌應相喃喃平沙鉅跡虎新過淺瀨織鱗鷗競銜
荒村無人但猿鳥古嶠有樹皆楓榭空青冥濛翳島嶼濕
翠杏靄沾衣衫誰藏一匣在絕壁云是諸葛兵書雨雨摧

風撼只如故欲墮未墮何由探山崖奇勝怪仍險况我愛
玩性所耽低回但恨弗學畫孤負佳境心徒慚每逢好事
輒爲說恍若親覩非虛談于今衰老返耕釣鬢髻兩鬢霜
氍毹觀圖忽起舊遊想浩然清興莫可緘題詩卷軸坐歎
息中宵夢逐滄江帆

春日山中尋泉

春泉試獨尋度壑復穿林忽見流紅遠方知入翠深色渾
因悟雨聲澹只疑琴盟弄忘歸去窮源空有心

擬唐塞下曲

羽箭鴈翎刀風沙北地豪弓開關月滿鵬沒陣雲高勁騎
三邊出名王一夕逃將軍方得意新拜璽書褒

呼韓窺近塞羽檄發精兵不識沙場苦焉知性命輕飢鷹
投古壘疲卒臥空營日暮轅門裏愁聽鼓角聲

夜坐彭贊禮竹塢

獨坐依修竹秋聲近戶多疎鐘清紫禁涼露濕銀河野飯
思薇蕨儒衣想芰荷小山招隱意藜桂有遺歌

送謝明府之桃源

楚地佳山水桃源境更幽汀蘭行處採湘水抱村流門掩
山城暮蟬鳴驛樹秋昔人遺洞在騎馬一來遊

郊祀齋宿彭太常永年公署

竹靜風停後瓶香茗熟時燈寒人未寢露冷鶴偏知頗愛
良宵靜翻嫌白日遲年年此齋宿載誦我將詩

太廟孟秋時享同陸員外齋宿

槐露滴新秋齋房夜色幽罷琴期月上捲幔見星流池冷
菰蒲靜窗寒竹樹稠清宵容易盡香茗且淹留

送周秀才遊長沙

迢遞長沙道蕭條晏歲遊亂山黃葉寺孤棹白蘋洲夕鳥
衝船過寒波背郭流毋論卑暑地賈傅昔曾留

南溪書屋

松竹連村暗軒窗面水清蘚痕留屐齒灘響雜書聲行藥
因過寺輪租斲到城靜觀簪紱累還喜布衣輕

送張巡檢之雲南

弓劍巡荒微衣冠別上林路經三峽險人到百蠻深枸醬

語獠俗兒童解樊音點蒼山色古道便一登臨

五峯菴住上人房

住公棲遯處重到只空臺竹榻無僧掃松關有客來夕陽
寒鳥集涼露候蟲哀祇苑猶如此何方免劫灰

晚至葉縣

擾擾道途間埃塵兩鬢斑清風牛背笛斜日馬頭山荷蓋
擎殘綠柵房破嫩殷蘋花秋水岸空羨白鷗閒

題陳道士處靜軒

索性便孤寂無營畫掩關臥聞清露墜坐見白雲還鶴夢
棋敲醒蝸牆蘚蝕殘仙瓢休掛樹風起似空山

軒車從擾擾窗戶自幽幽藥徑人蹤絕苔堦鶴跡留平生

雙短屐浮世一虛舟卽此堪棲隱何須物外遊

春草

苒苒復萋萋征袍映欲迷暖烟秦苑北寒食杜陵西綠嫩
羞鸚羽青柔襯馬蹄南園新雨過畦菜曉爭齊

雨中發洪都

豫章城下水如苔風雨官河一棹開山色遙連蕭寺瞑鴈
聲斜度楚雲哀霜凋遠樹寒燈見鳥背孤帆極浦回畫棟
朱簾遺閣廢荒基歲歲長蒿萊

訪鷺洲書院遺址

宋家書院但空名二水中分草樹平陵谷變來基亦廢野
人耕處草還生落花細雨文魚上殘柳西風白鴈鳴臨眺

不堪懷往事城頭畫角更淒清

挽張楫川處士

寂寞秋山落日邊草堂人去鎖寒烟移家北里無華館供
祭南山有薄田零落幽蘭餘澗底蕭條寒菊對門前天涯
莫致生芻奠灑淚西風一慨然

華屋邱山事已非先朝遺老近來稀徒令過客題新塚猶
有行人歎舊扉衰柳護餘陶令宅荒苔空沒子陵磯故園
朋友凋零盡暮雨寒雲弔鶴飛

題求志山房卷

久忘軒蓋身將老高臥雲林事總拋酒熟只知留客醉家
貧惟喜借書抄雲迷高樹猿窺果葉墜空林鶴葺巢試問

白駒空谷裏幾人黃髮在衡茅

送李生赴會試

明時自笑離羣久中歲仍傷送別頻
暮雪梅花殘臘酒東風楊柳上京人
仲容年少青雲早杜牧才衰白髮新
西抹東塗成昨夢天涯空憶杏園春

謫官後崇上人房話禪

下方無計避浮名且向空門話道情
久廢琴書緣性懶乍拋章綬覺身輕
山僧臘共雙松古野客心同片月明
亦欲斷緣依法住經函茗碗了餘生

送人還安城

客裏那堪送客歸臨分相對各依依
離亭酒盡人皆醉故

國書遙鴈亦稀斜日驛樓秋樹暗孤村僧舍暝鐘微武功
秀色青如染只好閑看靜掩扉

舍弟客錢塘索家書寫此示之

故園書信久荒涼愁對西風見鴈行身在京華依魏闕夢
隨潮信到錢塘仁添老態經憂患漸入中年易感傷閑看
白雲惆悵久不知清淚已沾裳

送于生還鄉

紅槿村稀夜合殘行人千里問鄉關客情偏在初秋裏旅
夢頻生半醉間細雨帆檣投極浦孤村燈火隔前山西風
無限滄洲意欲採芙蓉愧未閑

懷劉貢士孟恂

學館相逢意有餘，青燈綠酒夜窗虛。
眼看世事宜高枕，身在他鄉念遠書。
落日吟歸投樹鳥，清潭時見避釣魚。
山若有樵蘇，地擬結茅堂，傍隱居。

清明日憶先妻

客裏淒涼感慨頻，禁烟時節更酸辛。
鶯花謾濺中年淚，燕麥空搖異縣春。
德耀獨憐成薄命，黔婁誰與共長貧。
難將杯酒澆荒塚，腸斷東風倍愴神。

石期驛獨宿懷鄉

萬里馳驅負簡書，桂花開遍雨晴初。
窗敲落葉空庭靜，門掩殘燈古驛虛。
露冷疎林驚宿鳥，江清遠火見歸漁。
天涯回首懷親舍，欹枕無言意有餘。

桂藩城樓

桂林繞郡皆奇觀勝槩登臨此更多
五筦雲山連越嶠百巒溪水匯牂牁
藩垣愧乏涓埃補歲月真成漫浪過
只把新詩當遺愛他年畱與野人歌

泊龍潭

南轅北轍盡何求鬢不如霜不肯休
輪却江天漁婦火尋常夜夜照扁舟

宜陽山中

綠陰重疊鳥閒關野棗花香宿雨殘
天遣浮雲都捲盡教人一路看青山

小滿日口號

久晴泥路足風沙杏子生仁棟謝花長是江南逢此日滿
林烟雨熟枇杷

題老馬圖

生來骨相本權奇無復騰驤似昔時太僕憐才如愛惜只
教閑放莫教騎

梔子畫眉圖

薔薇初開雪亞枝枝頭好鳥立成癡少年京兆風流處似
汝花間對語時

昔年曾伴董嬌嬈長把春山笑倩描今日梁園空見畫鳥
啼花落鬢蕭蕭

李時勉

時勉名懋以字行安福人永樂二年進士選庶常授刑部主事修太祖實錄成進侍讀屢以言事下詔獄正統初歷國子監祭酒卒諡文毅改諡忠文有古廉集

按吉州人文紀略時勉名聰

挽劉處士

藜閣雲孫世共誇林泉幽隱老烟霞門前種竹爲三徑屋裏藏書過五車舊友每尋陶令宅行人猶問鄴侯家朔風蕭瑟空齋冷惟見梧桐幾樹花

古詩

深閨有思婦慘悽亦何爲容華不自惜獨理流黃機言將成匹帛多裁游子衣衣新忽變故恩愛從此衰以茲殷勤

意翻作長恨辭

蘭茝被幽畹桃李媚春陽
新婚結綢繆鞶衿散芬芳
弃置父母歡婉婉君子傍
白日麗朝彩朗月澄夜光
矢心以相顧願爲鴛與鴦

西墅起高臺迢遞憑雲岑
中有嬌豔女當窗弄清音
音容蕩以肆居然變同心
魚目奪明月讒口鍊黃金
不見冀中儲惻慘廢屐吟

高車擁旌旆輝映漢江曲
富貴一朝異窮窳辭別屋
言笑落日遲浩歌湘水綠
山川不可踰安得遙相逐
佳麗誠足珍涼薄難見錄

滔滔江漢流到海不復返
千里得所歸中復厭婉婉
在昔

枉綏綏駕言不辭遠誰知三周御却道羊腸坂芬芳空自
持白日忽已晚

昧且不能寐攬衣起中堂織縑與織素誰復知短長咫尺
組幽思迴環遂成章緘之戒僮御欲以寄遠方宛轉達苦
志敢期昔所伉

別久意恆親覽辭念愈結巾車適千里倏忽已超越鳴琴
諧古調恩愛感離闕夙心諒所負慙歎對明月睠言固終
始皓首以相悅

古意寄曾學士

梧桐生崇岡亭亭出雲林一朝樵夫採斤斧來相尋幸爾
爨下餘斲削成素琴粲粲絃朱絲煜煜徽黃金當窗試一

彈悠然太古音清風流水遠白雲蒼山深世無鍾子期誰
能識子心

送人南還

冀北霜寒正授衣西風忽與故交違馬嘶去路多秋草旆
拂離亭滿夕暉客路不堪千里別故鄉今見幾人歸到家
倘遇難兄問薊北雲邊一雁飛

春雨山中謾興寄憶誠辨戴隱君

回風吹雲雜高樹樹底紛紛作疎雨雨多十日未開門前
頭草色連荒村故人不來老却春山陰獨立愁將昏憶我
初遊上京國君獨看人惜離別鳳臺離思逐春雲剡曲閑
情對秋月幾日歸來接故園頓分鄰舍對柴關訪舊多尋

溪上棹看雲不厭門前山一家烟火人來去野水孤村自成趣仄徑長畱松竹陰低檐近引藤蘿霧草深沙路不堪行遲爾幽居待晚晴傳語先題數行字春窗多聽好鶯聲

畱別復古謝先生

青溪溪色照閑心古樹猶堪落夕陰小徑舊時通隱處清風長日在幽林閑窗却掃逢人坐村酒常沽不自斟杳杳青山成別去重尋應惜白雲深

夜至萬全城中小寺適寺僧亦自塞上歸

晚來尋小寺直上古城間石路斜通市禪房遠見山夜中孤客到月下一僧還靜禮無生法空門不記關

商婦怨

憶昔初結髮兩鬢黑如漆但恐君歸來白頭不相識

楊柳枝

章臺大道邊栗里舊門前苦被行人折何如伴醉眠

送謝謙牧任黔江

作縣三年政有成東來萬里到神京褒書已荷天邊寵歸棹還從峽裏行暑雨離亭看柳色秋風客路聽猿聲黔江江上棠陰下多少兒童竹馬迎

王英

英字時彥金谿人永樂二年進士選庶常讀書文淵閣掌機密文字修太祖實錄授修撰進侍講再扈駕北征歷南京禮部尚書卒謚文安改謚文忠

有泉坡集

扈從晚宿夾溝

初雨過符離雲霞望欲迷垂鞭信馬去傍輦聽鶯啼山繞
行營外溪迴帳殿西夜深聞鼓角天近月華低

送金諭德從征

帶甲軍容盛通宵羽檄飛安邊資武略制勝仗天威王氣
隨雕輦霜華上鐵衣單于心膽落指口受重圍

自勵

團團匣中鏡皎皎流素光鑒物無遁形妍媸安得藏經時
苦昏翳游塵慢飛揚顧此三歎息胡爲失其常拂拭去瑕
垢精采復煌煌衆污不可染持已貴自臧恆當慎夙夕惕

然以自防

挹秀軒

勝地風烟外，遙山紫翠分。
花飄千壑雨，簾捲半溪雲。
鶴語林間聽，樵歌谷口聞。
不妨招鄭老，對酒夜論文。

酬王尊師仙遊

翠水三山路，微茫見十洲。
月臨珠斗迴，雲度絳河流。
露氣生鰲背，簫聲出鳳樓。
慚無學仙分，得伴赤松遊。

漠漠層霄外，寥寥太乙居。
蒼龍翊飛蓋，白鹿輓行車。
翡翠瑤臺樹，雲霞玉洞書。
何因躡天路，探討極元虛。

羽節飄搖轉，霓旌汗漫遊。
紅光飛赤鯉，紫氣度青牛。
月上芙蓉館，風迴蓮葉舟。
遙憐徐福輩，入海訪瀛洲。

題龍氏龍州書館

幽居如杜曲松竹舊時栽溪路隨花入柴門傍水開風來
書帙散月出棹歌回還共土喬輩吹簫坐紫苔

元日昇平詞

華蓋中天近祥雲五夜多衆星環絳闕一水接銀河花滿
瀛洲樹香涵太液波長年逢此夕恩意共春和

仁宗昭皇帝輓詞

歲晏橋山路風凄薄暮天珠襦函夜月石馬鎖寒烟尊諡
高千古陵祠享萬年遺民念恩澤猶想奏薰弦

送南康翁教授赴任德安

白髮峩冠古晉賢十年風雪守寒邇關西不獨推楊震闕

下從來說鄭虔別路斜陽京口樹他鄉明月洞庭船郡齋
南望山如戟還似匡廬舊講筵

阿魯台受封後遣其幼子入侍

遠分符券冊天驕恩似春陽及草苗虜騎萬人先納款蕃
兒十歲也歸朝舊垂髫髻纏宮錦新賜珠纓珥漢貂暗想
黃雲沙磧裏托身何幸到青霄

朝回宴李君小館有懷

欲寄鄉書過鴈稀家山長在夢中歸天連楚澤波聲遠雪
暗交河樹影微每聽鄰雞馳曉騎多乘殘月着朝衣與君
退直歸偏晚把酒相看對夕暉

直禁中次韻

花樹陰陰鳥自啼從官多在掖垣西
霓旌浮動蒼龍影御馬行翻碧玉蹄
路入廣寒天語近涼生金掌月華低
幾回得侍宸遊處兩袖香烟晚更携

贈李將軍

青春玉帳樹牙旗蒲海風高列陣時
夜斬單于水上度曉驅番馬雪中騎
功存鐵券書丹字冠着金貂侍玉墀
誰道廉頗今白髮指麾猶可萬人師

少年行

漢家十萬羽林兒壯氣桓桓似虎貔
挽得琬弓射飛鴈賜將宮錦繡盤螭
春城走馬花開處夜鼓歸營月上時
應是太平無戰伐少年行樂正相宜

贈武子正遷巘山舊隱

積翠羣峰出盤雲古洞深澗花春帶雨山木晚澄陰
鴈鶴多年別江湖萬里心還携謝安妓歸去一登臨

秋初有懷呈曾侍講彭修撰二公

律應清商動涼生大火流梧飄金井露雁度玉門秋
簞影消殘暑砧聲報遠愁佳期七夕近乘月却登樓

舟過孟城

畫船撾鼓過孟城兩岸桃花春水平今夜湖中好風景
直須看到月三更

淮安別回御史

遠別悠悠鄉夢頻逢君况是異鄉春可憐湖畔青青柳
又

折長條別故人

和梁先生病中示子詩

陰陰榆柳滿城隅，官舍清幽似隱居。
深巷烏啼春過盡，閑庭草長客來疎。
思親遙望孤雲度，扈蹕俄驚一歲除。
昨夜燈光頻報喜，朝來已得萬金書。

親聞書報病初安，扶杖觀花意自寬。
只買山田閒種秫，因貪棋局更忘餐。
庭中客散春烟暝，谷口雲歸暮雨寒。
猶有江湖千里念，新詩傳到玉堂看。

六賢詠

黃待制

諱時字股士

待制本儒生素心，亦何烈臨危仗孤劍。
誓死以殉國，奮軀

人重泉正氣浩充塞蛟龍爲悲吟天地慘無色殺身良獨
難求仁義斯得

劉工部

諱傑字良甫

劉公廟堂器制行超羣儒累遷陟華要獻替多謀謨解組
值衰暮以獻返長途全軀效子容知止儕二疏周詩詠明
哲清風其穆如

陳渤海

諱介字彥石

渤海事文翰景範肅芳規一命才未究惜哉時已危悲悽
返故域凝睇掩荆扉薄採南山蕨莫充首陽饑遺生竟誰
待視死乃如歸

葛都事

諱元詰號文貞

文貞尚儒雅探索古聖經蜚騰冠羣秀久爲幕下英乘槎
重興歎道在時不行慷慨力陳言沉冥獨撫膺未能效仙
尉竊自比仲卿

王博士

諱彰字伯遠

伯遠負奇操肅然佩珩璜守官非狗祿蹈世歎危亡鳳凰
本靈鳥其鳴待朝陽頽光不足惜振翮千仞岡耻彼雞與
鶩饑食下翱翔

朱徵君

諱夏字元會

鳴陽有佳士金玉麗厥躬擔簦師先覺琢礪德彌充辭華
若利劍揚馬避其鋒懷寶終不售抗志靡他從勉遵聖師
訓固守君子窮

歸獵圖

獵罷陰山薄暮歸繞鞍雉兔馬行遲風高不敢鳴笳鼓只
恐防邊漢將知

端午日賜觀射柳

鳴蕭伐鼓催飛鞚列陣行雲擁翠華競挽凋弓如月滿盡
摧楊柳向風斜因知上將皆猿臂總道諸軍勝虎牙莫羨
天山曾獻巧射生今已靜龍沙

榆林直宿有懷邵庵學士對月之作

榆林春夜漏聲遲獨憶金章對月時翠袖清歌看駐輦彩
箋紅燭坐題詩連雲尚有青山在夾路應多綠柳垂北望
窮荒凋落盡昔年文物倍增悲

居庸關

千峯高處起層城空裏峯巒積翠明雲靜芙蓉開霽色天
清鼓角散秋聲北連紫塞烽煙斷南接金臺驛路平此地
由來稱設險萬年形勢壯神京

哀義士周益詩

步出崇明城遙望城南里天寒飢鳥啼日暮北風起綠楊
何蕭蕭衰草生故壘傍有三尺墳葬此千載士昔時從戎
馬一身赴邊鄙但全手足愛百戰何足畏崎嶇入關山辛
苦乃云逝傷哉有斯人薄俗誠所愧遺風何凜然聞者皆
墮淚

送彭秀才從天將軍英公征交趾

春雲欲雨半成雪，疾風吹衣冷如鐵。平明師出將軍行，城頭風高鼓聲咽。將軍自昔膽氣豪，身經百戰不辭勞。前年破賊平南趾，奏凱歸來功最高。去年從征塞北苦，今年又蹋東交土幕中。賓從多賢良，帳下諸軍盡貔虎。彭生本是江西人，少年今作將軍賓。拂衣仗劍來別我，慷慨南行思致身。畫船紅樓魯江中，流放歌北風起魚龍吹浪渡。三江旌旆連雲亘，千里炎州到日暮。春初銅柱山高有故墟，金戈鐵馬經行處。瘴雨蠻烟掃蕩餘，榕陰滿地花開遍。盪人重覩將軍面，將軍出令聲如鐘。詞客吟毫眼如電，知君際遇在斯時。會見功成日下歸，人生富貴須早致。豈是江南老布衣。

南老布衣

廼從宿臨城

伐鼓更鳴刁風高霧氣消遠山初上月野水不通橋地迴
過三峽花深似五橋應慚屬車未待漏向春宵

夜泊淮河北岸

曲岸風濤靜收帆夜泊舟潮聲和月上波影帶星流爲客
獨千里思家尚百憂通宵暫成寐歸夢到南州

送汪生別兄南歸

高歌一曲問清簾曲盡何堪更別離汶水烟波秋日暮彭
城風雨夜寒時行經遠郭聞雞早望入長江見雁遲得到
故園春已近滿池芳草不勝思

題滕王閣

鳴鸞佩玉憶當年遺跡荒涼倍可憐尚有殘花飛蛺蝶應
多古樹怨啼鵑西山疎雨浮雲外南浦驚濤夕照邊何事
王孫舊時草滿堤猶自綠芊芊

梅真觀

去國長懷萬里憂封章未報忍歸休已無忠諫居三輔獨
有威權在五侯舊館空餘秦地月古壇猶似漢宮秋傳聞
跨鶴三山去不向湘潭賦遠遊

江西詩徵

卷四十七

美

江西詩徵卷四十七